

Eskola Publiku “Kontra” Politika Joao Cancio Kona ba Estudante Isin Rua

Contributed by Madalena H. & Eva Almeida

Monday, 15 March 2010

Last Updated Tuesday, 16 March 2010

CJITL Flash, Politika Ministeriu Edukasaun ne’e fo oportunidade ba estudante feto isin rua bele nafatin hetan edukasaun formal wainhira partus hetan reasaun maka’as husi Direitur Eskola Publiku balun iha kapital Dili tanba kada eskola mos iha regulmentu rasik.

“Ami iha regras kona ba estudante ne’e isin rua ne’e, ami la bele fo tempu para nia atu tama fali eskola porque tuir regras ne’e, estudante kuandu isin rua la bele tama fali escola”, dehan Vise Direitur Eskola Sekundaria 12 Novembru, Jose Abilio, Kinta semana kotuk iha Bekora-Dili.

“Tamba ami mos iha regras depois aban bainrua maka ita hare’e maibe ami la aseita ho desizaun Ministru Edukasaun nian”,

Iha oportunidade ne’e mos Vise Direitur ne’e preokupa ho kondisaun eskola ne’e ladun favorese ba estudante iha primeiru ano no segundu ano tamba tu’ur deit iha simenti wainhira tuir aprendizajen.

Kondisaun ne’e sira infrenta tamba ekipamentus eskola hanesan meza no kadeira lakon hotu iha tempu krizi politika militar tinan 2006.

“Estudante barak maka tur deit iha rai hodi simu materia, problema ida ne’e ami hato’o bebeik ona ba iha Ministru Edukasaun”, nia dehan. “Dala ruma nia membru sira mai iha ne’e hodi hare’e rasik kondisaun eskola nian maibe to’o agora seidauk hetan ajuda ruma husi sira”,

Iha fatin ne’e hanesan, Estudante Sekundaria 12 Novembru, Ernesto da Costa preokupa tebes ba ekipamentus eskola nian tamba estudante barak liu ho meza kadeira.

Ho kestaun ne’e nia husu ba Ministru Edukasaun João Cancio atu tau atensaun maka’as para bele rezolve lalais difikuldade ne’e sira infrenta.

“Meza kadeira la to’o ba ami, ne’e duni ami husu ba ME ho Governu tau netik matan mai ami ne’e eskola iha fatin ida ne’e”, tenik Ernesto. “Ajuda netik meza kadeira e nomos livru bainhira ami atu halo tugas ruma maibe livru laiha”,

Parte Parlamentu Nasional rasik mos preokupa ho kondisaun eskola iha kapital Dili ne’e infrenta problema tamba udan boot monu rai iha fulan kotuk liu ba.

Membru PN husi komisaun F, Mateus de Jesus parlamentu aprova ona orsamentu lubuk ida ba ministeriu ne’e refere maibe la hatene tamba saida mak eskola sira nafatin infrenta iha kondisaun ne’e la diak.

“Agora ami iha planu foin lalais orsamentu 2010 tau tan osan ba ministeiru ne’e bele perpara meza ho kadeira ba eskola hotu bainhira ano letivu sasan tenki kompletu ona”, tenik Mateus

Nune’e mos koko atu hasoru Ministru Edukasaun, Joao Cancio hodi konfirma kona ba asuntu ne’e refere maibe la konsege tamba Ministru la iha tempu. (Lena, Eva/CJITL)